

## Rencana Pengarang

di dalam perusahaan tidak dapat diselam dengan mendalam.

Umpamanya soal mendapatkan modal. Kerajaan berusaha membantu tujuan ini. Kerajaan mengadakan "MARA", kerajaan menubuhkan Bank Bumiputera dan lain-lain dengan tujuan-tujuan dan maksud yang baik, tetapi pelaksanaan ? Soal inilah yang harus dikaji untuk meliputi maksud-maksud yang dituju. Kita tidak bermaksud supaya kerajaan menumpahkan segala-galanya tetapi kerajaan menghalusi dan menyelidiki dengan tenaga keahlian dan kemahiran di dalam sesuatu bahagian – bukan pakai borong sahaja sehingga orang-orang memandang lebih mudah meminjam dan mendapat bantuan dari badan-badan asing daripada badan yang ditubuhkan oleh kerajaan yang kohnnya ditujukan kerana membantu rakyat bumiputera.

Kita berharap persoalan ini dapat perhatian bersungguh-sungguh dari kerajaan atas dasar yang tersebut.

\* \* \*

### Persidangan Dewan Perniagaan Melayu di Ipoh

Syor-syor yang dikemukakan di dalam Persidangan Dewan-dewan Perniagaan Melayu yang diadakan di Ipoh baharu-baharu ini menarik kita menulis rencana ini, kerana daripada syor-syor yang dikemukakan dan di bawa ke dalam persidangan itu menampakkan adakah ia senam atau pun sepuh dalam sesuatu golongan atau pun puak untuk perkembangan sesuatu bangsa bagi masa yang akan datang.

Di antara syor-syor yang dikemukakan di dalam Persidangan Dewan itu ialah mendedak supaya diadakan syarikat

perkapalan, mengubah nama *Malaysian, Singapore Aerobus*, mengurangkan cukai pendapatan perniagaan, yaitu perkara-perkara yang tidak kena mengena atau pun kalau ada, jauh benar dengan kedudukan perniagaan dan taraf perusahaan-perusahaan orang-orang Melayu.

Syor-syor yang didatangkan begitu tinggi dan tidak termakan di dalam usaha-usaha orang-orang Melayu sendiri di dalam keadaan baharu bermiaga itu tentulah menjadi sesia sahaja dan tidak memberi bekas dan tidak berfaedah kepada ahli-ahlinya, kerana umpamanya mengadakan syarikat perkapalan – bukanlah satu usaha yang mudah dan terdaya permodalannya dan mengisinya oleh usaha-usaha orang-orang Melayu.

Hal ini dapat diperhatikan oleh peserta-peserta sebagai perwakilan dewan-dewan perniagaan itu, dan dengan kerana itu moleklah tiap-tiap syor yang dikemukakan ke dalam Dewan Perniagaan itu syor-syor yang boleh dilaksanakan dan diamalkan dan dijalankan dan memberi faedah kepada peniaga-peniaga dan pengusaha-pengusaha Melayu – bukan untuk beramai-ramai berkumpul dan bersidang – tetapi tidak memberi dan membawa sesuatu faedah dan mendatangkan kebajikan kepada umum.

Perkara-perkara yang diusaha dan dijalankan hendaklah yang boleh dijalankan dan berfaedah dan dapat dilaksanakan. Kita yakin kerajaan sentiasa memberi pertolongan di dalam usaha menolong dan memajukan orang-orang Melayu, terutamanya di lapangan perniagaan dan perusahaan, asakan sahaja menepati seperti yang dikatakan oleh Tun Abdul Razak di dalam suatu ucapannya : "Kerajaan sedang membuat sedaya upaya untuk menolong saudagar-saudagar

Melayu, tetapi usaha akan sesia jika mereka tidak berusaha dan bersungguh-sungguh dalam menjalankan tugas mereka."

Dasar yang dikatakan beliau sangat benar. Kita mendapati masih banyak di dalam golongan kita yang menamakan dirinya "saudagar Melayu" tetapi pada namanya sahaja, sedang usahanya dijalankan oleh lain-lain bangsa. Mereka hanya menjadi patung-patung di dalam perusahaan dan perniagaan – tidak sebenarnya berusaha dan bermiaga.

Tetapi sebaliknya masih ada bangsa kita yang berusaha dan bermiaga dari modal yang kecil, dengan bersusah payah, percaya kepada tenaga dan diri sendiri untuk menegakkan tarafnya supaya dapat bersaing dengan bangsa asing. Sedikit berkata tetapi banyak bekerja. Dan telah terbukti usaha-usaha yang semacam inilah yang patut mendapat perhatian dan difikirkan bersama.

Hendaknya dewan-dewan pemergaan Melayu bawalah syor-syor atau rundingan yang rendah dan berfaedah yang boleh dilaksanakan supaya bermanfaat kepada seumur ahli-ahlinya – daripada bercakap besar, berunding, tetapi habis rundingan tidak memberi faedah dan tidak dapat dikerja dan dilaksanakan.

\* \* \*

### Revolusi Mental – Kebahagiaan atau Keruntuhan ?

Di dalam lain ruangan, kita ada menyiarkan ucapan Syed Nasir bin Ismail Pengarah Dewan Bahasa dan Pustaka di pameran buku-buku yang diadakan di Melaka baharu-baharu ini. Beliau telah memberi perhatian terhadap kepada adanya langkah-langkah "revolusi mental" yang dianjurkan oleh golongan pemerintah

## Rencana Pengarang

sekarang, yang di dalamnya tidak diasaskan kepada soal-soal yang konkret mengenai kebudayaan dan pemegangan rakyat di kampung-kampung terutamanya orang-orang Melayu yang beragama Islam.

Sebagaimana dimaklumi bahawa kebanyakannya – kalau tidak dikatakan semua – orang-orang Melayu adalah pemeluk agama Islam dan mempunyai keturunan-keturunan yang patuh kepada ajaran-agaran agama Islam. Tetapi di dalam masa yang akhir ini dikatakan kurang berkemajuan – menurut istilah pemimpin-pemimpin atau orang-orang yang terkemuka yang memimpin mereka. Kerana itulah mereka makin jumud (beku) di dalam amalan agamanya, makin sempit di dalam memahami agamanya, terutamanya apabila penjajah menghalang kemajuan beragama yang sebenar yang dibawa oleh ahli-ahli agama Islam yang tidak jumud hidupnya.

Apakah kemajuan yang dihadapi dan dikehendaki dan apakah “revolusi mental” yang dihajat untuk membina kemajuan orang-orang Melayu? Syed Nasir jelas memberi jawapan atas soal ini, tetapi perkara yang zahir kepada kita, bahawa merbahaya yang dihadapi oleh masyarakat agama di hari ini, ialah kejumudannya dalam beragama, jauh daripada ajaran-agaran agama, tidak mengenal agama, melanggar hukum-hukum agama, bahkan menentang ajaran-agaran agama sehingga pemimpin-pemimpin yang menganggap agungkan membina “revolusi mental” bukannya sahaja menentang ajaran agama, tetapi turus menghidupkan agama-agama yang

menentang dan memusuhi ajaran-agaran Islam yang dari dahulu berkerja dengan seribu daya untuk meruntuhkan Islam.

Kalau “revolusi mental” dan ‘revolusi pembangunan” untuk rakyat yang menuju kepada kemewahan untuk memuaskan nafsu, dan tidak didasarkan kepada ajaran-agaran dan pendidikan Islam, maka kehancuran Islam di negeri ini menanti saat dan ketika, terutamanya apabila kita umat Islam pakai patuh kepada pemimpin-pemimpin atau pengaruh-pengaruh yang membawa kita kepada jalan maksiat yang ditegah oleh Allah dan rasul-Nya dan kita menolong serta menyertai pekerjaan itu.

*Al-hamdu-lillahi rabbil-kawni wal-  
bi-ta’awun wal-’adāt al-birri wa al-taqwā wal-  
ta’awun ‘alā al-ithmi wa al-‘udwān.*

Maksudnya : Dan bertolong-tolonganlah kamu atas berbuat kebajikan dan janganlah bertolong-tolongan kamu atas dosa dan anianya.

Al-Ustaz Al-Shaykh Muhammad Al-Khiḍir Husayn, - Professor Kuliyyah Uṣul al-Dīn di al-Azhar Mesir – telah mengupas ayat ini dengan jelas dan terang, bahawa agama Islam itu menghendaki pemeluknya bertolong-tolongan di antara satu dengan lain atas kebajikan dan taqwā, terutamanya menjaga hak-hak agama, diri, kehormatan, akal, keturunan dan harta. Inilah perkara-perkara yang ditugaskan oleh agama untuk dihidupkan di dalam jiwa manusia yang beku dan jumud, yang terdiri daripada orang-orang agama yang fasiq itu.

Kerana menjaga agama, maka setiap umat Islam diwajibkan mempropagandakan agama serta membelaanya dari serangan-serangan dari luar.

Untuk menjaga diri maka diwajibkan pula qisas (dibalas bunuh) ke atas orang-orang yang membunuh orang dengan sengaja atau merosakkan anggota-anggota lain, demikian juga memelihara anak serta mendidiknya adalah diwajibkan oleh Islam.

Untuk menjaga kehormatan umum, ditetapkan pula hukuman yang tertentu di atas orang yang berani menuduh orang baik-baik berlaku jahat jika tidak memberi keterangan yang cukup kuat.

Untuk menjaga keselamatan otak dan kewarasannya, syariat telah melarang meminum arak apa jua macam minuman yang memabukkan sekalipun apa jua namanya; dan demikian juga dihukum orang yang merosakkan akal orang lain.

Untuk menjaga keturunan agama, dianjurkan perkahwinan serta menetapkan hukuman yang merosakkan anggota badan orang lain sehingga tidak dapat lagi bekerja seperti sedia kala.

Untuk memelihara harta, agama menetapkan hukuman terhadap pencuri baik lelaki atau perempuan.

Seterusnya agama Islam mengharamkan meminta-minta bagi orang yang ada tenaga dan berupaya berusaha.

Agama Islam mengajarkan pemeluk-pemeluknya rajin dalam semua usaha dan pekerjaan dan menuntut ilmu kerananya dengan sungguh-sungguh – bukannya fasiq. Sebab itulah kemajuan didapati oleh mereka dengan sepenuh-penuhnya.

## Rencana Pengarang

Untuk menetapkan supaya agama berjalan dengan lancar, maka agama Islam mengadakan hukuman-hukuman atas orang yang meminum arak dan seumpamanya seperti yang tersebut, supaya mereka waras akalnya dan sempurna fikirannya di dalam menjalankan segala tugasnya dan kalau umat Islam membiarkan bermakna kita menyertai kerosakan masyarakat itu.

Untuk menjaga keturunan diadakan perkahwinan dan saksi-saksi atas perkahwinan itu, supaya tetap keturunannya dan jangan terjadi anak-anak yang tidak tentu asal keturunannya.

Ada banyak hal-hal yang diajarkan dan digalakkkan yang semuanya menjauhkan daripada maksiat, kerana maksiat itu adalah membawa kepada kecelakaan. Kalau “revolusi mental” yang tidak disalurkan dengan ajaran-ajaran agama yang dianuti oleh umat Islam, yang dituju kepada umat Melayu, maka kemunculan agama akan terjadi – dan tidak salah seperti kata Syed Nasir revolusi mental mereka akan jadi bertentangan dengan adat resam dan kebudayaan orang-orang Melayu di negeri ini.

Kita melihat bahayanya yang sangat besar dengan adanya revolusi mental ini kepada umat Islam, apabila kita selarikan revolusi mental ini dengan langkah-langkah yang dijalankan dengan adanya badan pemuda dan sukan yang dianjurkan oleh kerajaan. Bahaya-bahaya ini dapat dilihat daripada semakin jauhnya anak-anak kita daripada agama dan daripada banyaknya anak-anak kita menjauhkan diri daripada tempat-tempat ibadah yang didirikan

oleh kerajaan. Jadi apa yang dibuat oleh kerajaan itu dengan sendirinya berlaku di antara satu sama lain dan

dengan demikian segala usaha-usaha dijalankan itu sebenarnya tidak konkret.



Duli Yang Maha Mulia Sultan Selangor sedang bertutur di rapat umum pada hari memperingati keputeraan Nabi Muhammad *sallā Allāhu 'alayhi wa sallam* yang telah diadakan di Stadium Merdeka Kuala Lumpur pada 8 haribulan Jun 1968 yang lalu.